

Na osnovu člana 212. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07 i 2/08) i člana 210. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH", br. 27/03 i 21/09), Parlament Federacije Bosne i Hercegovine na sjednici Predstavničkog doma održanoj 2016. godine i na sjednici Doma naroda održanoj 2016. godine, donio je

AUTENTIČNO TUMAČENJE
ODREDABA ČLANA 20. ZAKONA O PRINCIPIMA LOKALNE SAMOUPRAVE U
FEDERACIJI BOSNE I HERCEGOVINE
(„Službene novine Federacije BiH“ br. 49/06 i 59/09)

- 1) Nadležni organ za preispitivanje odluke općinskog vijeća, odnosno općinskog načelnika je organ koji je nadležan za nadzor nad primjenom zakona koji je povrijeđen.
Ukoliko u zakonu koji je povrijeđen nije naznačen organ za nadzor nad primjenom zakona nadležni organ je kantonalno, odnosno Federalno ministarstvo pravde, u zavisnosti od toga da li je povrijeđen kantonalni, odnosno federalni zakon.
- 2) Kada nadležni organ ocijeni da odluka općinskog vijeća, odnosno općinskog načelnika, nije u suprotnosti sa zakonom o tome će bez odlaganja donijeti odluku i o istoj obavijestiti podnosioca zahtjeva za preispitivanje odluke i donosioca odluke koja je bila predmet preispitivanja.
Kada nadležni organ ocijeni da je odluka općinskog vijeća, odnosno općinskog načelnika u suprotnosti sa zakonom o tome će bez odlaganja donijeti odluku i dati upute donosiocu odluke da, u roku od 15 dana od prijema odluke, otkloni uočene nedostatke.
Ukoliko uočeni nedostaci ne budu otklonjeni u ostavljenom roku, organ nadležan za preispitivanje odluke, donijet će odluku o obustavi primjene odluke koju je preispitivao.
- 3) Autentično tumačenje predstavlja integralni tekst ovoga zakona, te se shodno primjenjuje od stupanja na snagu Zakona o principima lokalne samouprave u Federaciji Bosne i Hercegovine („Službene novine Federacije BiH“ broj: 49/06 i 59/09)

PF broj: _____/16

_____ 2016. godine
Sarajevo

Predsjedavajuća
Doma naroda
Lidija Bradara, s.r.

Predsjedavajući
Predstavničkog doma
Edin Mušić, s.r.

O B R A Z L O Ž E N J E

Razlozi za autentično tumačenje Zakona o principima lokalne samouprave u Federaciji Bosne i Hercegovine („Službene novine Federacije BiH“ broj: 49/06 i 59/09) sastoje se u potrebi da se ovaj zakon učini primjenljivijim, te da se razjasne određene dileme koje su se pojavile u njegovoj primjeni.

Naime, u praksi se pojavilo pitanje „koji je nadležni organ za preispitivanje odluka općinskog vijeća, odnosno općinskog načelnika u slučajevima predviđenim u članu 20. Zakona o principima lokalne samouprave u Federaciji Bosne i Hercegovine“, te se ovim autentičnim tumačenjem želi definisati organ koji je nadležan za preispitivanje zakonitosti odluka općinskog vijeća i općinskog načelnika, kao i postupak preispitivanja zakonitosti odluke.